



e

詩卷第四終

記

南樓吟香集舊刻於硤川西山起
自乙丑正月至戊辰二月得詩六
十四首已經問世閱今一歲復刻
於邑中清遠堂刪抹增訂共得詩
乙百零首每體各爲一卷大約五
年內詩之可存者略備矣至舊時




言一
本子舛偽甚多見者幸勿置案頭
皆

康熙己巳年閏三月一日馬思贊

仲安甫記



序



憶余六歲時受訓師氏攻詩書九齡習女紅議酒食遂不
知墳典爲何物也迨三十作未亡人不言文采日課兒輩
讀書惟懼以詩詞妨其制舉了不留意今老矣間與吾妹
漢姝相酬和每樂道古名媛遺事而於忠孝節義之行托
諸吟詠以見志常謂妹之蘭質蕙心非等閒可幾也詎知
姪女惜幼而慧婦職之餘更嫺篇什抑至是耶初侄女年
十五字仲安才情兼至聯吟於花間月下詩文日益進吾
兒鎬與仲安昆季同事筆硯每稱其志氣凌雲今古文無
不洞達固皆非常士也乃如弱女子者亦旣宐爾家室而
工於詩歌復爾爾源遠流長豈與世之握管者比哉夫詩

也者發乎性情範乎禮義一唱三歎之下恒足以動物感
人移風易俗非僅爲風雲月露花鳥虫魚之咏已也予閱
其詩其寄懷也正其命意也深不以鉛華爲炫而淡而醇
永知其天分過人也則卽是編之溫柔敦厚已足附卷耳
葛覃風天下而傳後世寧惟是風雲月露花鳥虫魚之咏
而已乎是爲序

時

康熙己巳春三月未亡人祝柔嘉書



弁言

竹宗

惜兒幼有慧質授詩古文便能了了心口間刺繡之餘閒
弄筆墨余喜其不染塵俗氣故不復禁之然七絕而外大
約未得佳也歸仲安後今蓋四年矣其間米鹽酒食刀尺
管筐觸緒紛來卽應之甚暇亦損詩懷吾甚虞其掛一而
漏萬也苟不爾當亦無失邯鄲故步已耳豈能另開生面
追踪彤管耶今年春仲安以惜兒詩稿至畧展數帙駸駸
乎駕舊業而上之古體近律更覺軼群余始而喜繼而疑
疑夫東床之效東里也不然一弱女子胡便能頓頽衰老
婦耶故樂爲之弁其首母氏上翼下昭一字漢姝題寄惜
兒以付剗劂時

康熙歲次戊辰二月月既望之三日



自叙



余年六歲母氏授唐絕數章花間詞數闋每當團欒家會時大父呼曰汝其咏唐咏畢則賜餅餌歲時伏臘率以爲常至八齡又授毛詩古文然俱口習未嘗手習也戊午秋夜侍兩大人家園步月大人命曰惜吾語女女讀書積寸何無一吟咏以卽景爲題余遂有輪月自明閨人自愁之句大人俱歡咲永夕自是而後妄自塗鴉存諸笥中幾幾盈帙要皆一時誌興未耐人思蓋性不喜作蠹魚生活意以詩者不過寫胸中之樂聊以適志焉耳安用拘洵者爲且婦人謹守深閨初非以求聞達爲自怡悅計而適以自苦余又何愛焉所以回思昔日其足供家人覆瓿者固不

自餘一
少也行年十二從事女紅暇日或撫焦桐吹柯竹彈碁丹
青之類稍稍諳習顧見獵而喜又情隨事遷畧知一二輒
便棄去雕虫小技無一能精而向所習詩古文已束之高
閣絕不復覽矣卽遇花朝月夕與從姊蕙姪婦婉思侄女
瑄二三人唱和不過偶一爲之以免金谷之罰耳豈足數
哉十五歲冬結褵後得從仲安快讀唐宋以來詩文全集
自謂捉筆將較前俚言必有進矣無如邇年內從姊早嫁
朱氏姪婦別居北塘姪女流離秦楚又將遠適維揚求爲
二三唱和渺乎不可再得夫詩者原不過寫胸中之樂聊
以適志耳今乃幽居寥落如是而欲詩之多且善也能焉
否耶今因仲安言詮次全稿苦無存者只此數首偶於南

樓敗紙中覓得之顏之曰吟香集自爲之序蓋亦存此適
志聊慰父母之心應仲安之命而已若云卽此足窺全豹
則汗顏殊甚

歲次戊辰二月廿有一日淑英查惜題于南樓



吟香詩目

卷一 五言古體

呈家仲安

又

古意

感懷

咏史四首

今羅敷行

同仲安游家園西山

題玉窓遺稿後

海鹽奇女子

海昌董節婦

吟香詩目

卷二 七言古體

讀史

題家仲安畫松圖

悲狂風

行路難

悲哉行

枯魚過河泣

江南水

難女墓

紀事 十四首存一

往井篇 逸

東風篇 逸

南樓見雪篇 逸

郭節母挽歌

附

禽言二首



吟香詩目

卷三 五言近體

題家園南樓
西山家園

古意

苦雨寄仲安

冬閨寄仲安

秋干

乞晴
南樓夜坐和仲安韵

月夜聞角

讀漢史

鶴

憶母

聞任女理入秦因賦

燒香女

戊辰除夕同仲安賦

琴臺



吟香詩目

卷四 七言近體

春望

花朝見雪傲春江花月夜

寄兄鑿揆

女子有嗜烟者戲成

牡丹

明妃

七夕

除夜呈仲安

代仲安游嶓山作

龍山女子

中春寄懷侄婦媿思侄女瑛兼致姊蕙

夜讀周南

恭賦 聖駕南巡用仲安原韵

贈妓



一州亭圖書

吟香詩目

卷五 五言絕句

幽居二首
二月

名女倩
春詞二首

墓門
口占

夏日即事
闡前寄仲安二首

慰仲安下第二首
題仲安寒江釣叟圖

病中句和仲安
集古詩咏李冶

小周后
李清照

擬子夜歌二首
簷溜

偶成
無題十首和仲安韵 逸

吟香詩目

卷六 七言絕句

賦得遊魚啖花影
人日辭似氏飲

送女尼入山
病起

從軍行和唐人韻
宮詞

讀林鴻張紅橋集二首用原韻
夜闌西湖集成詩三首

贈侄克凝
示裴氏甥郭氏甥并示侄之泰三首逸

題畫
和小青焚餘五首

寄仲安
題畫梅

立夏
夏夜

雪水徐夫人唐瑤持扇索畫因題贈
初見姊氏祝宗縈



代仲安許氏枕濤莊看梅二首
送侄女理入楚兼適維揚四首

對奕呈仲安
妣氏見賜涼州葡萄

龍山女子

秋聲
戌夢
無題



南樓吟香集卷之一

五言古詩



漁村馬思贊仲安定

女史查 惜淑英著

呈家仲安

周鼎浮洛水龍劍出豐城寶氣不終沒人懷萬古情不如
乘騏驥不如駕長鯨行游向京洛高望凌蓬瀛茂先勵素
志終軍請長纓修能繼內美特達宏家聲

又

人言夫婿殊夫婿殊文章冥思出天地抽筆開洪荒高舉
振六翮梧桐栖鳳皇德輝被天下不與燕雀翔繇來三都
賦紙價貴洛陽

古意

秋風吹妾夢之子上河梁一去三百日復見丹桂香紅樓
望征雁金井聽啼螿懶撫焦桐曲不理羅衣裳夜月鑿皎
皎獨自守空房

感懷

猛虎吼深山百獸皆殲鯨鷲鳥奮千尋鷓鴣入幽谷一落
陷網中心震而身伏豈無爪與牙窘困難浩育嗟爾世間
人雄風胡震肅

咏史四首

豁達漢高帝定陶得戚姬楚歌悲宛轉楚舞妙低徊商山
來四皓鴻鵠成羽儀呂后真而主對景徒歎歎何似項家

婦血化彩雲飛

開寶繁華盛花月當春風捲甲江南下命婦入深宮冊宣
鄭夫人帝心私有許咨嗟而涕洟徒嘆家非汝

人死名須留豹死皮可鬻卓哉王彥章千古同一哭梁主
雖非賢國士爲我畜此心不可移此身肯再辱佩刀引自
裁天地皆怒觸至今存鐵鎗餘威震殊俗

宋家王氣弱滿目盡烽烟文山文丞相大義垂卓然向爲
賢郡守笙歌列綺筵拜讀勤王詔繁華頓棄捐戎馬嬰辛
苦流離不記年誰知運百六帝死臣囚燕異哉王炎午生
祭文一篇

今羅敷行

鄰家有艷女號曰今羅敷嬌痴成素性出入倩人扶三月
春光好東風綻縈蕪追游紫陌上試着紅羅襦盈盈姊與
妹梳掠共相呼繁華亦云樂母乃有狂夫

同仲安游家園西山

麗日方亭午陟自山崔嵬青松夾廣路碧壑殷輕雷好鳥
啾啾集閒花歷歷開徑轉入南澗相與坐徘徊遠看海上
山山有鳳皇臺臺高無百尺清淺隔蓬萊欲駕舟與楫幾
度生黃埃觀之長嘆息同歸步紫苔簫聲杳靄間幽情得
得來

題玉窓遺稿後

遺稿爲孀氏葛南有所著秉風酌雅直追三百篇

遺聲惜乎玉窓人去未得親炙耳謹識數語以深
山高水長之想

惜余生也晚不獲親儀容玉窓垂遺稿金石宜流風自是
種間氣才調吞長虹麗哉謝道蘊柳絮失其工大家續漢
史前後躡高蹤今我再三讀泳之久彌沖徒愧難追步小
技嘆雕虫

海鹽奇女子

海鹽奇女子行當就木年鶴髮絲絲白未知適所天堂上
有阿母晨昏必周全下有小弱弟提携自愛憐家庭種和
氣不用夫婿賢古稱木蘭女從軍守志堅更聞斷臂婦性
至形可捐今得黃花媪相對胡慚焉

海昌節婦

姓虞名嫵嫁董氏

東海有節婦容華耀娥娥秉志學梁孟琴調瑟亦和阿翁
凜義方歡愛成蹉跎兒本薄祿相空齋咄咄多一朝作死
別身掛東南柯用計誠苦拙魂斷莫如何妾欲隨君逝高
堂有舅姑昔日人如木今也木為夫雕鏤人宛在眠食共
將扶久之肩睫動神氣若相呼阿翁怒不止求間殺兒軀
血濺衣衫濕精誠不可枯紅顏原薄命木偶又何辜一慟
身隨絕冥會即如蘇人生皆歎歎芳名還在無

南樓吟香集卷一終



南樓吟香集卷之二

七言古詩



漁村馬思贊仲安定

女史查

惜淑英著

讀史

防邊萬里長城築築罷長城鬼夜哭不見塞馬牧咸陽烽
烟忽起驪山麓旌旗獵獵皆楚軍八千飛渡淮水漬蹀血
秦原汚秦土陰風白日吹愁雲回首重關一百二野火入
宮火正熾昔日英雄安在哉泰山空有碑無字

題家仲安畫松圖

西山脚下十八公天矯離奇霄漢中憑君縱筆寫直幹黛
色蒼髯俯碧空古來大夫處士多擎錫我欲比德百折不

回之孤忠萬古不磨之英雄

悲狂風

今我不知蒼天何所怒走石揚沙捲白茅八姨聲動逐雷
電飛廉噫氣滿西郊蟠龍潛螫無寧窟黃鵠驚飛失故巢
幽人縮項南樓最高處正如滄海崩瀉山動搖吁嗟世路
多逼仄何獨狂飈任怒號翻手作雲覆手雨一顰一嗟皆
波濤仲安豈是長貧賤放後無須作廣騷君不見漁翁放
櫂凌江上偏向中流把竹篙

行路難

行路難不在羊腸之屈曲蜀道之巔峴行路難不在三峽
之逆流十八之長灘康莊途生荆棘順水舟多狂瀾世人

盡知設險之爲險誰知至險乃在乎與安濁酒頻頻進焦
琴續續彈賤妾歌一曲爲君竟日歡君不見聰明反被聰
明誤知雄守雌天下寬

悲哉行

與君同坐南樓之南梧桐之上最高柯一聲長笛一聲歌
歌罷涔涔淚傾瀉憂從中來何其多世上風波不長定南
山有鳥北山羅欲甘貧賤惟守拙男兒立身多坎軻日月
不我再功名易蹉跎長沙前席是何日高密從軍今若何

枯魚過河泣

家仲安性最落托塵視一切其與人交往往多否
少可又嘗作玩世態以鳴其不平嗟乎古道淪喪

于今爲極安用此不近人情之爲余每南樓相對
長言不足涕泣隨之今拈樂府不勝三致意焉
枯魚河邊過淚下皆成血令我發悲吟中心蘊如結魚本
欲跳龍門之高高俯鰕鮓而排蛇鱉誰知縮項捲鬚我躬
不閱回望洞庭秋水夜漫漫遍處菰蘆與霜雪水族皆有
父母妻子歡恐使恩情中道長訣絕吁嗟乎竿頭餌巧施
設魚自衛亦多缺

江南水

江南山中惡龍出江南水勢增穹窿沿江居民成魚鱉亦
有逃難過江東我家住在東海角二月門前來老翁後隨
長女雙了髻小女披髮提竹筒自言本是良家子祖父遼

海總兵戎我獨田園甘守拙天降不仁安令終有妻有妻
趙一氏彩雲飛斷泣孤鴻有兒鄭大與鄭二一南一北任
飄蓬今茲幼女同緣木父子相對哭途窮我聞數言愴心
骨生死流離恍夢中仰看蒼天欲起語蒼天不語高矇矇
但原太平無一事窮山海壤盡春風

難女墓

難女墓乃在南山陲爾本誰家掌上珍埋香此地抑何悲
大化不仁降洪水居民十萬飽龍螭漁人捕魚西江上忽
驚網內得西施又怪西施非一一十六香閨艷弱姿東西
飄泊應千里猶然連袂共相持吁嗟逝難各岐路爾胡至
死不分離我今奠汝酒一卮魂兮歸來歸莫遲我心更有

傷悲處回念秋風瓠子時

紀事

西家有女貌如花嫁與東邨小仲子郎情兼玉復兼金誰料妾情同逝水翠被香消深夜時忽聞獅吼來相訾怨不在大在傷心因之病發難再起郎哭床頭妾不聞開奩却自裁羅綺郎緣招手囑一言將作嫠婦胡爾爾翻咲君家非達人活者自活死者死

郭節母挽歌

仲安姊氏適郭卽太夫人之冢孫婦也歸寧龍山每爲余道太夫人之行事甚悉今太夫人往矣其孫所刻節行錄足傳千古淑英勉爲續貂以深高

山之仰

嘆息復嘆息郭母栢舟節母本太丘之懿範作嬪太原年十七鬱金之堂玳瑁梁海燕雙棲無時失夫壻游學入帝京挾策握管思風雲雞鳴旻旦戒長途挽車幸同桓少君悠悠三千路難涉易水風寒陌草薰悲哉游龍忽云逝母年十九鸞鏡分少婦扶喪返故園白獰之港佳城址佳城松栢鬱青青妾心誓擬同君死吁嗟一死胡足論死易立孤爲難耳爰請高堂立後嗣伯氏之子直吾子有子有子曰元升提携鞠育多苦辛母心望兒早成立特達家聲顯揚親誰知兒大非吾福舊鬼哀鳴新鬼續我生不辰遭禍殃夫旣哭兮兒又哭幸存膝下三孩孫有道風流未絕纓

阿母育子更苦憫三孫頭角俱崢嶸誰知兒大原非福老
母翻自絕人族生死流離數十年胡天不厚善人祿吁嗟
乎泰山高高兮不可攀郭母貞節兮永矢而勿告淑英願
濟太平兮不願一往多躑躅雖然變起倉猝兮平時豈能
料所欲人世倘遇變徵兮賢哉郭母乃其鵠

附

禽言二首

話弗得苦話弗得苦苦從中來何可數願風吹入天邊月
一向嫦娥吐
不如歸去不如歸去流落他鄉向誰語長安信美非故園
故園寧無慮



吟香集卷之二終

七言古詩

南樓吟香集卷之三

五言近體



漁村馬思贊仲安定

女史查 惜淑英著

題家園南樓

自來作婦姑嫜命居南樓朝于斯暮于斯也因思
 古人居其地即名其地之所自如陋室之銘小園
 之賦皆是今吾南樓面山襟水窓可望月牖可停
 雲仲安偕余坐臥其中是亦問字亭彈琴宅也爰
 賦短章并序其自

庾亮有南樓斯樓不與儔屏開山似畫簾捲月如鉤詩思
 憑高得晴光入望收自應仙史駐彷彿鳳簫留

西山家園

西園新結構遠俗不聞譁野水穿幽徑群峯護晚霞花非
陶令宅竹是阮公家回首官塘路紅塵起亂鴉

古意

用屋北鹿獨宿韵

阿嬌貯金屋忽爾來湘北兩地共迢迢相思徒鹿鹿春風
花柳同寒夜錦衾獨相彼鴛與鴛合歡枝上宿

苦雨寄仲安

苦雨滴三更閨中獨夜驚殘缸分夜照孤局冷疎枰遊子
歸思急幽人百感生南窓長寂寂若個最惺惺

冬閨寄仲安

輕寒侵碧瓦薄袖倚紅闌開篋刀針在應知客子單錦字

緣誰達銀缸獨自看北風吹雁去寄語且加餐

秋千

畫梁橫綵索小婢鬪輕盈似燕空中舞非鸞雲外迎繡裙
斜未整鳳髻墮還驚細濕香羅汗臨風玉樹傾

乞晴

天高億萬丈晴豈乞能來曠朗無時見陰霾幾日開緣之
悟世道兼以得心裁立志誠須早無爲後世哀

南樓夜坐和仲安韵

樓頭深夜坐城鼓正三更月落人初定風來琴自鳴咲言
無瑣屑詩酒漫推評底怪圍林鳥無端啞啞聲

月夜聞角

獨自對殘更荒原畫角鳴聲隨風外落愁傍月邊生九折
魂難定三秋夢不成君行日已遠賤妾若爲情

讀漢史

漢室當全盛高皇志氣雄蕭何定律法韓信總兵戎不數
兩京業遙追三代風臨文經濟短史冊愧徒攻

鶴

仙禽疑羽化飛舞下瓊霄華表千年恨揚州萬貫驕素姿
欺白雪丹頂映紅綃孤月寒風夜誰爲伴寂寥

憶母

數載別慈闈日歸未得歸忘憂空樹艸開篋便沾衣豈乏
三更夢其如兩地違願隨雙鳥翼長傍故園飛

聞侄女瑄入秦因賦

霜天聞雁早胡事入三秦應爲檀郎信眷言班女輪紅衫
休染淚官署總留春只有深閨別臨風獨愴神

燒香女

春早江南花開三月都人士女霧集雲屯大抵皆
托言燒香耳嗚呼內則之謂何乃復爾爾因不顧
忌諱作咲罵語質諸當世諒不以風雅道喪有明
言露文之誚也

撰日周花甸乘春出洞房不嫌違內則拜廟識緇郎蜂蝶
窺裙帶鐘鏡縮珮纒猶言興未盡來歲再尋芳

戊辰除夕同仲安賦

明香集 卷之三
強仕君將半正須早問年高堂同起舞溪夜各分箋賴有
盈尊酒曾無壓歲錢成週小倩倩學拜膝之前

琴臺

彈琴人已去此地獨留臺流水穿林合高山入座來悲風
陰白日細雨鎖蒼苔憑弔情何極餘音空復哀

題晞髮集

國運已眠桅乾坤忠義開相臣囚北地處士拜西臺鵲血
深山滴幽魂寒夜來至今讀遺稿四座鬼風哀



南樓吟香集卷三終

南樓吟香集卷之四

七言近體



漁村馬思贊仲安定

女史查 惜淑英著

春望

一望頻爲物候驚高樓凭處思盈盈鶯非選樹間關轉花
亦乘春歷亂明綠水漲來艇子疾青山踏去馬蹄輕傷心
遍是王孫路芳草萋萋遠更生

花朝見雪傲春江花月夜

花朝何事雪飛揚十里梅花帶雪教豈是花神多雪恨故
教雪色壓花香花時有雪揚春調雪裡無花寂莫鄉怪却
雪消花發後花經雪盡又經霜

寄兄鑒揆

予自結襦南麓一再歸寧丙寅秋九追歡兩大人
後裘葛數更晨昏久缺遠父母兄弟風人所以致
慨也未免有情能無眷眷當此雨雪益復淒其爰
賦短章以寄瞻望非敢曰愁苦之音易好也

夢繞西廳舊薜蘿晨昏久矣缺經過寒侵雨雪愁歸路調
入陽春孰和歌自嘆樓頭來雁少空懷江上落梅多吾家
池草年年綠柳絮飛時近若何

女子有嗜烟者戲成

手持銀管佩烟囊也道陽和煖繡腸一點朱櫻開粉靨半
遮醉面滯紅睂清風繚繞雲鬟絲佳氣氤氳蓮舌香却怪

圍屏斜倚處嫣然含笑嚼檳榔

牡丹

余素不愛西崑詩體應仲安命作此殊不工綴

碼碯盤承金鏤光樓前誰結麝蘭囊涼州打散憑蘇子洛
下高低嘆趙郎仙鹿雖來應治亂花妖已去變青黃明朝
午後茶初熟分付東君好主張

明妃

一曲琵琶出塞聞可憐紅粉學從軍關山夜度宮中月朔
漠霜侵馬上裙淚別金門驚漢帝怨深毳幕駭胡羣試看
塚上青青草孰與巫山朝暮雲

七夕

梧桐落葉火西流七日還逢七夕秋
牛女星從河畔轉關山月自笛中收
參差羣鵲空成渡多少深閨獨倚樓
天上已增離別恨人間謾莫說綢繆

除夜呈仲安

藏鈎戲罷意珊珊小閣挑燈送鵬殘
縷篆沉檀添寶鴨杯傳琥珀醉辛盤
寒灰吹谷春將到蠟炬裁詩夜未闌
勸爾莫悲往去事且同兒女話團圓

代仲安游嶰山作

嶰山眺罷轉前溪行盡山溪日又低
纍纍荒丘成古昔紛紛村杜雜東西
漸無洗耳高風在孰是登臺逸興齊
歸路欲尋迷去住亂楊枝上鳥空啼

龍山女子

余生長龍山近聞東邨女子工詩善病
尤能按霓裳羽衣之舞是亦未易才也
彼魂斷馬嵬月冷秦淮何便能掩絕
千古耶因作舞詩題曰龍山女子蓋不
僅以能舞盡之

玉環人去哭三郎南國香消又李唐
今日風流重按律昔年歌舞未全荒
徘徊顧影驚雲散婀娜臨風落月黃
最愛三眠春瘦後依然楚楚著衣裳

中春寄懷侄婦婉思侄女瑄兼致姊蕙

結伴東籬又隔年春風吹盡落梅天
韶先正自難留待雨雪如何更滿前
幾處虛舟橫野渡數行歸雁下平川
樓頭

唯爾能相憶應向花溪一放船

夜讀周南

苕菜當年冠國風須知起化在深宮后妃一自歌
樛木小婦還能賦草虫嘆息流風千載後依稀淑氣
二南中椒房世守睢麟意用轍緣何西復東


恭賦 聖駕南巡用仲安原韻

江南二月麗春暉為念民勞降紫微路入黃河尋故道車
臨禹穴溯前徽萬姓羣沾天子惠千家爭看聖人衣
雨師風伯何須用遍處謳歌繞駕歸

贈妓

楊柳迎風帶暮鴉竹橋西去是儂家半春好事隨流水一

片閒情對落花舊夢不堪重咲語前途正好覓生涯試看
江畔商人婦曲奏琵琶幾嘆嗟



南樓吟香集卷之四終

吟香集

卷之四

七言近體

四

南樓吟香集卷之五

五言絕句



漁村馬思贊仲安定

女史查

惜淑英著

幽居二首

卜居南山下棲遲似鹿門閒來事垂釣流水入西邨

仲安非仲蔚曲逕自蓬蒿爲報門前客江干莫漫勞

二月

二月江南地風光處處春誰家妖艷女遮面看行人

名女倩

命名垂竹史豈必丈夫子倩盼咏碩人願爾亦同此

春詞二首

花柳爭寒食金銀壓繡鞍誰家年少子矯首上長安
腰裏鴛鴦帶頭簪玉葉冠青樓紅粉女都半立闌干

墓門

墓門春草閉石馬曉風寒五鼎臺前列幽魂何處餐

口占

芙蓉漲綠水浦上一魚竿莫說漁家樂漁租亦到官

夏日

汗濕羅衣重風來紈扇輕炎涼俄頃變且復理揪枰

闡前寄仲安二首

別爾夢魂勞披衣理舊操琴中頻寄語遮莫鬱輪袍
芰荷開未罷淮粟落風前待折庭前桂還看並蒂蓮

慰仲安下第二首

梧桐秋漸老王孫憶芳草春去秋復來何自傷懷抱
鵬飛垂北溟豹隱自南山驚破三秋夢相看鬢未斑

題仲安寒江釣叟圖

獨上釣魚磯秋風鱸膾肥此中真意得處處足忘機

病中句和仲安

爾我同耽病南樓半藥烟男兒埋壯志弱質更何憐

集古詩咏李冶

山氣日夕佳衆鳥欣所托相賞有知音聊厚不爲薄

小周后

月暗輕輕霧去來好自閒誰知故國夢雙淚別江山

李清照

閒氣種閨秀偏輸一段情
雨疎風驟後曾憶趙明誠
擬子夜歌二首

清露展晨葩暮落花無數
花意無朝昏郎情有新故
感郎折花枝故作風情賣
語妾妾不聞背郎弄衣帶

簷溜

冷質多光采春來顏色改
何如冰蘂心終始長相待

偶成

推窓理曉髮彷彿阿香來
莫使愁時樣臨風照鏡臺

南樓吟香集卷五終



南樓吟香集卷之六

七言絕句



漁村馬思贊仲安定

女史查惜淑英著

賦得游魚啖花影

小苑花飛蹴曉波游魚戲
浪口脂多空中呼吸香應透
何事浮蘋更聽歌

人日辭姒氏飲

臘破新年日漸長懶將梅額試
新妝春來不解愁何事辜
負東家玉女漿

送女尼入山

嘆息人生歲月移羅衣脫處戒衣垂
清風一掃紅塵夢未

許張郎得畫眉

病起

閨中難度病中年塵滿妝臺慵捲簾此日南樓重病起厭
施紅粉拂花鈿

從軍行和唐人韻

萬里從軍鐵甲寒閨中征雁寄書難夜來唯有高高月塞
北江南一樣看

宮詞

晚妝初試近昏黃著意迎新黛色長忽聽笙歌來別院君
王已報入昭陽

讀林鴻張紅橋集二首用原韻

朝天待漏句初工已是多情怨晚風那復牀頭留佩玦朝
朝哭斷北來鴻

孤風寒月夜迢迢讀罷遺詩燭影搖一片香魂何處問亭
亭隱隱是紅橋

夜闋西湖集成詩三首

元夜看燈花市晝當窓一曲鳳皇簫風流會散人何處烟
鎖雲橫六部橋

右題簫媒傳

西閣尋春興未已無端好事又東家何須鬼說三分話始
泛南昌八月槎

右題鬼關西閣傳

此身未北客南州料得西湖是盡頭千里斷魂關塞黑夜
深猶到岳陽樓

右題金淑貞傳

和小青焚餘五首

正月上元夜偶讀小青仙集各人和章無一當意
者仲安同余各成詩五首斯時也月色照窓鄰家
簫鼓喧喧入耳迅筆落紙風雨欲來詩之工拙了
不知也

羅衣初試綺窓前正是江南肆夏天聞道後園花信好却
教腸斷並頭蓮

明月亭亭照碧紗春風好夢屬誰家孤山山外猿聲苦夜

半何嘗哭落花

學梳雲髻共相爭姊妹風流各擅名獨有孤山人寂寞自
臨秋水照卿卿

七香車子日麟麟也共長鬟學弄春蘇小墓頭風雨惡胡
爲錯認意中人

窓外風篁韻可聽幽人坐月夜亭亭誰憐寂莫孤山裡瘦
影年來寒色青

寄仲安

淒風苦雨響梧桐驚起愁人曉夢中寄語齋居好自愛寒
林莫聽雨和風

題畫梅

瘦影橫枝映小窓，獨標冷艷傲寒霜。芳心不共凡心競，淺淺淺描時淡淡妝。

立夏

隔窓鶯語喚真真，驚破深閨夢裡春。知是春光留不住，送春誰是惜春人。

夏夜

臺畔月明螢火迷，碧蓮香氣透深閨。夢魂未到清涼境，又是簾前促曉雞。

雪水徐夫人唐瑤持扇索畫因題贈

未親瓊珮早知名，棗栗無由致一緹。紈扇殷勤勞遠問，願將繾綣托丹青。

初見娣氏祝宗繁

少同衡宇久聞聲，長共門楣佐紫荆。待却入厨三日後，盥匱相與聽雞鳴。

代仲安許氏枕濤莊看梅二首

一時臘屐踏蒼苔，選勝還尋玄度來。知是今霄良宴會，數枝冷艷爲君開。

謾道名花庾嶺栽，枕濤莊上雪成堆。今朝已醉花間酒，隴上何須更寄梅。

送侄女理入楚兼適維揚四首

浣花軒子各分箋，曾記挑燈相荷憐。一自今朝長別後，幾時重與話當年。

閨中弱質怯衣單那復長悲道路難若到荆襄南楚地好
將詩句報吟壇

桃花零落杏花殘畫槩夷猶入楚灘一路烟雲湖水濶應
憐紅袖倚船闌

遠嫁難情自古憐今朝相對淚潸然莫愁前路音塵斷取
次歸鴻附一箋

對奕呈仲安

怪殺當年王積薪山中對奕暗傳神如何七尺奇男子指
點偏須一婦人

姒氏見賜涼州葡萄

聞道葡萄比夜光如何今日得承筐殷勤千里蒙相餉珍

重當年出未央

龍山女子

事詳七律

霓裳一曲高千古今日風流得在無龍嶺月低雲闕彩應
知長袖展花膚

秋聲

荷芰殘時楓葉紅一聲斷鴈叫西風愁心寄盡還多少依
舊蕭條入夢中

戊夢

夜憑好夢慰相思萬里孤雲來去遲半路忽驚風雨惡幽
魂狼籍度燕支

無題

閒來斜倚小窓東
楓葉黃花送晚風
一片夕陽簫瑟處
天邊望斷繫書鴻



吟香集卷之六終

